



for April 21

(in the next few pages)

V



LE SACRE ET COVRON
nement du Roy Henry deuxieme de
ce nom.



De l'imprimerie de Robert Estienne imprimeur du Roy.

Par commandement & priuilege
dudit Seigneur.



LE SACRE ET COVRON
nement du Roy Henry deuxieme de ce
nom: Faiet & celebre en la ville de Reims
en Champaigne.

I Edict Seigneur ayant de-
liberé proceder a sondict
sacre & couronnemēt, feit
apporter deuers luy en sō
chastel de saint Germain
en Laye , les ornamens e-
stans en garde en l'abbaye de saint Denys
en France , destinez audict sacre & couron-
nement,C'est assauoir les camisole, sendales
ou botines, esperons, espee, tunique, dalmatique,
mātel royal, sceptre, main de iustice,
grande & moyenne courōne, pour veoir en
quel ordre lesdics ornamens estoient . Et
pource que ledict Seigneur veit que lesdics
camisole, sendales, tunique, dalmatique, &
mantel estoyst ia deteriorez & vsez par laps
de temps , & pour auoir serui a plusieurs &
autres sacres & couronnemens de ses prede-
cesseurs : il voulut & luy pleut en faire faire
de tous neufs , C'est assauoir ladicte cami-
sole de satin cramoisi excellent, doublee de
taffetas aussi cramoisi, & bordee d'ung tissu
d'or d'ung poulce de large , a deux petites

A.ii.

nerueures de soye bleue.

Lesdites sendales ou botines furent faites de satin bleu azuré, couuertes, plus plein que vuyde, de fleurs de liz de fil d'or, doublees de taffetas, & semeées de satin cramoisi. Et au demourant enrichies par les bords & par diuers endroicts de l'auat pied, d'une riche brodeure de perles assises sur fond d'or traict.

. La dite tunique de pareil satin bleu azuré semée, plus-plein que vuyde, de fleurs de liz de riche broderie, doublee de taffetas cramoisi, enrichie par toutes les fentes & bordures, d'une riche broderie de perles de quatre doigts de large, faicte a trousses de fleches, doubles arcs turquois, trois croissans lacez ensemble, & chiffres de doubles DC, liez & attachez d'une lettre de H.

- La dalmatique de semblable satin bleu azuré, semée pareillement de fleurs de liz, & enrichie d'ung pareil bord de perles sur fond d'or traict, doublee de taffetas cramoisi.

Le mantel royal aussi de satin bleu azuré, semé de fleurs de liz de riche broderie, doublé de satin cramoisi, & enrichi d'ung bord de perles sur fond d'or traict d'ung grād demi pied de large & de pareils chiffres & de uises que les precedens. Auquel mātel royal

fut adioustee & approprie la fleur de liz d'or, assise en vne lozange de perles, & enrichie de plusieurs rubis ballaiz:laquelle fleur de liz seruoit d'agraphe ou attache sur l'espaule droicte audict vieil mātel royal. Toucessois que au seruice de ce diuin sacre & of fice ledict Seigneur feit mettre pour ce iour au lieu de ladict fleur de liz , vne croix faite de cinq tresgrandes tables de diamans: vng diamant rond au pied de ladict croix, representant vne fontaine : & trois autres grans diamans taillez en larmes ou forme de cloux. Et quāt aux susdicts esperons, espee, couronnes, sceptre, & main de iustice, (qui sont toutes choses precieuses, enrichies de perles & anciēnes piergeries de grand estime & valeur,) ledict Seigneur les feit seulement restablir ou il y falloit de l'or, rebrunir & remettre en telordre,qu'elles pouoyēt apparoistre toutes neufues.

Et procedant ledict Seigneur a l'effet de sondict sacre & courōnement le X X V iour du mois de Iuillet, Mil cinq cens X L V I I , il se rendit en vne maison priuee prochaine des portes de ladict ville de Reims, la ou il receut l'obeissance , offres , & requestes de ceulx de ladict ville.

Et ce fait, feit son entree en icelle, en la-

quelle luy auoyent esté preparez plusieurs
plaisans & somptueux spectacles. Et tāt che
mina, qu'il arriua au portail de la grand' E-
glise : la ou il trouua monsieur l'Archeues-
que de Reims accompagné des pers ecclé-
siastiques , de ses Euesques , suffragans , &
plusieurs autres prelats en habits pontifi-
caulx, avec son chapitre. Et la ledict Seigneur
arriué , se meit a genoulx sur vng grand
drap de pied de veloux cramoisi, enrichi de
broderie d'or, & deux carreaux de pareille
richesse & estoffe soubz vng grand dersellet
aussi de veloux cramoisi , enrichi de som-
ptueuse broderie d'or & d'argent. Et apres
que ledict Seigneur eut faict son oraison,
baise le texte des sainctes Euangiles, a luy
presenté par mōdict sieur l'Archeuesque de
Reims:& ouy l'oraison qu'il luy voulut fai-
re, il fut par luy introduict en ladictēEglise,
ayant ledict Seigneur a sa dextre mōsieur le
Cardinal de Giury Euesque & duc de Lāgres
au lieu de mōsieur le Cardinal de Bourbon
Euesque de Laon qui estoit absēt. Et a la sene
stre mōsieur le Cardinal de Chastillō Eues-
que & conte de Beauvais. Lesquels deux pre-
lats le menerēt iusques deuāt le grand autel:
la ou il se meit a genoulx sur vng grād drap
de pied, avec deux carreaux de riche drap

d'or frizé . Et apres auoir faict son oraison, lesdicts deux Euesques de Langres & Beauuaus le menerent baiser le grād autel:la ou il presenta vng riche reliquaire de la Resurrection de nostre Seigneur saillāt d'ung sepulchre, faict de riche agathe, qui pouoit estre estimé a la somme de mil escus d'or . Et lequel reliquaire luy fut administré par le Roy de Nauarre apres l'auoir reuerāment baisé, pour le mettre es mains dudit Seigneur.

Ce faict , ledict Seigneur se meit dedans son oratoire tēdu & dressé a la main dextre dudit grand autel , la ou il ouyt vespres en grande deuotion, officiant mondic̄ sieur de Reims . Et icelles dictes &acheuees, ledict Seigneur se retira au palais archiepiscopal iusques apres soupper heure de huit heures, qu'il reuint en ladict Eglise pour satisfaire a ses deuotions: la ou il entra soubs vng paullon de veloux cramoisiviolet, enrichi par les fentes & plusieurs autres endroicts d'une riche brodeure de main de brodeur & orfeure , doublé de toile d'argent , la ou ledict Seigneur se confessa tresdeuotement . & apres se retira a sondict logis pour prendre son repos.

Et lors furēt mis capitaines & gardes en ladict eglise pour en faire vuyder tous ceulx

A.iiii.

qui y estoÿt, excepté le seigneur de la Bourdaiziere, ordonné pour paracheuer les preparatifs & accoustremens par luy mesmes commencez, & qui furent telz qu'il sensuit, pour l'office & seruice du lendemain.

Et premierement tout le deuant du grād autel, iusques a la marche prochaine a la pierre sur laquelle se met le sœau de l'eau béniste, fut couuert & paué de veloux cramoisi, enrichi par semence bien espesse de cordelieres de guypure d'or : & par dessus & ioignant ledict grand autel fut posée & assise la chaize en laquelle officie ordinairemēt mondict seigneur l'Archeuesque de Reims, couverte d'ung grand drap de pied de drap d'or raz.

Vis a vis de ladict chaize, enuirō dix pieds en arriere, fut assise vne autre chaize pour le Roy sur vng grand drap de pied de tresricher drap d'or frizé, & couerte de mesme. Et entre la chaize dudit Seigneur, & celle de mondict sieur de Reims y auoit vng appuy d'oratoire couuert d'ung autre grand drap de pied de tresricher drap d'or frizé, avec deux carreaux de mesme, dont l'ung & le plus bas estoit de cinq quartiers de long pour seruir tant audict Seigneur, que audict Archeuesque de Reims lors qu'il se veint

prosterner avec ledict Seigneur durât la letanie, ainsi que la ceremonie le requiert, & qu'il sera dict cy apres.

Derriere le Roy, enuiron cinq pieds, y auoit vng escabeau carré, couvert de drap d'or raz, sur lequel fut assis monseigneur le Connestable. Et plus arriere enuirô quatre pieds de distance y auoit vng autre escabeau pareillement couvert de drap d'or raz : sur lequel fut assis monsieur le Chancellier. Et plus arriere enuiron trois pieds, sur vne selle de huit pieds de long, aussi couverte de drap d'or raz, furent assis au milieu monsieur le Mareschal de saint Andre, qui seruit de grand maistre. A sa dextre monsieur le duc de Longueuille grand chambellan. Et a la senestre monsieur le Mareschal de la Marche, qui seruit de premier chambellan.

A la dextre dudit grand autel y auoit vne longue selle couverte de drap d'or raz, sur laquelle furent assis les pers ecclesiastiques. Derriere eulx, & pres dudit grand autel, y eut vne chaize aussi paree de drap d'or raz, ou fut assis monsieur le Cardinal de saint George, legat du pape. a ses pieds, son caudataire. Et devant ledict caudataire sur vne petite selle carree paree de veloux cramoisi, enrichi de broderie, son porte croix.

Du mesme rang de la chaize de mondict sieur le Legat , y auoit vne longue forme, aussi couverte de drap d'or raz : sur laquelle furent assis messieurs les Cardinaulx du Bellay, de Meudon, de Lorraine, & de Ferrare, leurs caudataires a leurs pieds . Et derriere eulx, sur deux longues formes furent assis plusieurs Archevesques & Evesques . Et encores derriere eulx y auoit deux longues formes pour gentilshōmes de la chambre & gentilshommes seruans.

Et ioignant iceulx, de ce mesme costé , y auoit vng eschaffault entre deux piliers paré de broderie de fleurs de liz de gaufreure d'or sur satin bleu, & d'hermines de veloux noir sur toile d'argent : auquel furent assises plusieurs dames & damoiselles de maison. Et au dessus d'iceluy y en auoit vng autre pareillement couvert & aorné, auquel fut la royne, & plusieurs princesses & dames . Et auquel ladict dame estant grosse d'environ six mois , pouoit venir de son logis par autres allees & eschaffaulx a son aise & plaisir , & hors de toute preffe.

A l'autre costé & senestre dudit grand autel, y auoit vne chaize couverte de drap d'or raz , pour le Roy de Nauarre , representant le premier per lay . Et suyuant icelle, de ce rang y auoit vne longue selle, aussi


couuerte & paree de drap d'or raz : sur laquelle furent assis les autres cinq pers laiz.

Derriere eulx vne autre longue selle aussi paree de drap d'or raz, sur laquelle furent assis messieurs Danguyen, plus prochain de l'autel, Loys monsieur de Vendosme, monsieur le prince de la Roche sur Yon , monsieur de Vaudemont, monsieur d'Estampes, mōsieur le Marquis de Maine, & le seigneur Orace Fernaiz.

Et derriere eulx sur trois autres grandes formes aussi parees de drap d'or raz, furent assis plusieurs princes , cheualiers de l'ordre, capitaines, & gentilshōmes de la chambre , iusques a vng eschaffault faict entre deux piliers, & correspōdant a celuy estant a l'opposite (dont mention est faicte cy deuant) qui fut pour les ambassadeurs du Pa-pe, de l'Empereur, d'Angleterre, d'Escosse, & Venise , aorné & paré de riches fleurs de liz de gaufreures d'or sur satin bleu, & hermines de veloux noir sur toile d'argent.

Au dessus dudit eschaffault y en auoit vng autre pareillement paré & accoustré, qui seruit pour dames & damoiselles.

Au pulpitre de ladicte eglise, au dessoubz du crucifix, fut dressé & assis le throsne royal dudit Seigneur , ainsi qu'il sensuit, & qu'il est en figure cy attachée.



Au milieu dudit pulpitre y auoit vne plate forme de sept pieds de long, & cinq pieds de large , en laquelle lon montoit du plan dudit pulpitre quatre marches, sur laquelle plate forme estoit assise la chaize du Roy en telle maniere que luy estant illec assis, le peuple estant en la nef de ladicte Eglice, le voyoit par derriere des la ceinture en amont.

Deuant luy y auoit vng appuy d'oratoire, au dessoubs duquel, & sur le plan dudit pulpitre , y auoit vne selle , sur laquelle fut assis monsieur le Connestable . A sa dextre, sur la seconde marche de ladicte plate forme , estoit assis monsieur de Longueil le grand Chambellan . Et a la senestre sur la premiere & plus basse marche de ladicte plate forme, estoit assis monsieur le Mareschal de la Marche, representant le premier Chambellan . Et vne marche plus bas que le plan dudit pulpitre sur vng petit eschaf fault saillant entre les deux montees, furent assis a la dextre monsieur le Chancellier. Et a senestre , monsieur le Mareschal de saint Andre, seruant de grand Maistre.

A la dextre du Roy , contre l'appuy dudit pulpitre qui regarde sur la nef , furent assis les pers ecclesiastiques . Et a la senestre

y auoit vne chaize , sur laquelle fut assis le Roy de Nauarre. Et ioignant iceille & de ce mesme rang, sur vne longue selle, furent assis les autres pers laiz. Tous lesdicts throsne, sieges, enuirons, & parterre dudit pulpitre, couuers & aornez de riche tapisserie de veloux cramoisi violet azuré, semé (beaucoup plus plein que vuyde) de fleurs de liz de riche gaufreure de fil d'or: fors & excepté vng autel qui estoit au bout dudit pulpitre a la dextre du Roy, qui fut paré d'une chappelle & ornemens, chasuble, tableaux, & corporalier de riche broderie de guypure sur veloux cramoisi haulte couleur , qui seruit pour la basse messe dudit Seigneur.

Les deux mótees pour aller audict throsne & pulpitre larges de six pieds , furent parees , C'est assauoir le bas sur quoy lon marchoit , de veloux cramoisi , semé de riche broderie de fil d'or. Et les acouldouers, barrieres, & appuis, de satin bleu azuré, semé de fleurs de liz de gaufreure de fil d'or.

Le lendemain, X X V I^e dudit mois, iour saincte Anne , enuiron six heures du matin, le Roy despeschra les seigneurs & barons de Montmorenci , Viconte de Martiques, de Rieux, & de la Trimoille, pour aller a l'abbaye de sainct Remi , requerir l'ab-

bé dudit lieu de venir & apporter en ladite eglise de nostre dame de Reims la sainte ampolle, pour d'icelle prendre du sainct huile, & estre employé au sacre dudit Seigneur, se obligeans & se faisans caution lesdits baron & seigneurs de la rendre & restituer a ladite abbaye de sainct Remi , apres qu'il en auroit esté pris autant comme il en seroit besoing pour ledict sacre.

Lesquels partirent incontinent pour cest effect, avec leurs escuyers & gentilshommes, portant l'ung d'iceulx, chascun deuant son maistre & seigneur sa baniere peincte & designee de ses armes & couleurs : menans avec eux vne hacquenee blanche, sur laquel le fut porté & rapporté le grand prieur de ladite abbaye de sainct Remi, avec vng poile de damas blanc a fleur d'or, qui fut tousiours sur ledict grand prieur, tant de l'aller, que du retour en ladite abbaye.

Et tost apres le partement desdicts seigneurs & barons, partirent du palais archiepiscopal logis du Roy, les trois pers ducs, & les trois pers contes laiz, vestuz & habituez, C'est assauoir d'une tunique de damas d'or traict, longue iusques a mi iambe. Et par dessus, d'ung mantel ou epitoge de large drapée, teincte en escarlate violette, avec collet

rond & renuersé fourré d'hermines mouchetées: la teste nue, enrichie, c'est assauoir lesdits trois ducs d'ung chapeau d'or, & ce luy du Roy de Nauarre plus eminent que les autres deux: & lesdits trois côtes, de cercles aussi d'or: tous, tant chapeaulx que cercles, enrichiz & couuers d'une grande quantité de pierrerie d'inestimable valeur. Les māteaulx susdicts ouuers & fenduz sur l'espaule droicte : & encores enrichiz sur l'ouverture de boutons & agraphes de precieuse pierrerie, avec telle differēce, que lesdits trois ducs auoyent sur l'espaule gauche par dessus la troussiere du māteau, chascū trois petites limbes de tissu d'or traict , bordees d'hermines aussi mouchetées. Et les contes ayans chascun deux desdictes limbes seulement de pareille estoffe & facon. Et tant desdicts ducs que des contes , l'entredeux desdictes limbes enrichi d'autres bagues & pierrieries.

Lesdits pers laiz ainsi accoustrez & vestuz, se rendirent en ladicte Eglise, pres du grand autel, ou ia estoit monsieur l'Archevesque de Reims accōpaigné de messieurs les pers ecclesiastiques, lesquels furent assis en l'ordre qui sensuit, sur les deux formes & longues selles , desquelles cy deuant a esté

faict mention: C'est assauoir du costé des ecclésiastiques, mōsieur de Lāgres le premier & plus pres de l'autel, qui estoit la place de monsieur de Laon, sil eust esté en presence.

L'Euesque de Beauuais le second.

L'Euesque de Noyon.

Celuy de Laō, qui deuoit estre le premier: mais pource qu'il estoit absent, representé par mōsieur de Xaintes, au quatrième lieu.

Et celuy de Chaalons, qui deuoit estre le quatrième : mais pource qu'il estoit absent, representé par monsieur de Troye, au cinqième lieu.

Sur ladiète autre forme & longue selle a l'opposite de la precedente, estoient assis les pers laiz: C'est assauoir sur la chaize prochaine de ladiète forme du costé de l'autel , le Roy de Nauarre representat le duc de Bourgongne.

Monsieur de Vendosme , representant le duc de Normandie.

Monsieur de Guise , representant le duc d'Aquitaine.

Monsieur de Neuers, representant le conte de Toulouse.

Monsieur de Montpencier , representant le conte de Flandres.

Monsieur d'Aumalle, representant le con

B.i.

te de Champaigne.

Et estans ainsi assis lesdicts vnze pers , & mondict sieur l'Archevesque de Reims faisant le douzieme , assis en sa chaize , le dos contre l'autel, furent deleguez par eulx ensemble mesdicts sieurs les Cardinaulx de Giury & de Chastillon , Evesques de Langres & Beauuais, pour aller querir le Roy en son logis: lesquelz accōpaignez processionnalemēt des chanoines,vicaires, & chape-
lains de ladict eglise, les deux croix,cierges,
eaue beneiste,& encensiers marchans deuāt
eulx,vindrent en la premiere châbre dudit
Seigneur paree d'une tresriche tapisserie a
or & soye.le plâcher d'icelle fonce de fleurs
de liz de fin or,assises sur satin bleu azuré:&
de croix de toile d'argent , assises sur satin
cramoisi.

Contre la cheminee de ladict chambre
y auoit vng riche ders tout couvert: pentes,
fons , & dossier de broderie a personnages.
Et sur le liet vng ciel de pareille facō & bro-
derie . Ledict liet couuert d'ung grand drap
de damas d'or sur soye cramoisie trainant
en terre de tous costez.Sur lequel liet le Roy
estoit couché,ayant soubz sa teste vng oreil-
lier de riche broderie sur veloux cramoisi;
& vestu d'une fine chemise de toile de Ho-

lande, richement ouuree, fendue deuant & derriere, pour receuoir la saincte onction.

Et par dessus, la camisole de satin cramoisi cy deuant designee, aussi fendue deuant & derriere pour semblable cause, & d'une robe longue en facō de robbe de nuit, de toile d'argent, frisee, enrichie par le collet, fentes des manches, & autres endroicts, de tres grandes esmeraudes, assises en chatons d'or esmaillez de rouge cler.

Et lors que lesdits Euesques de Langres & Beauuais apperceurent ledict Seigneur, commencerent a dire certaines oraisons. Apres lesquelles finies &acheuees, ledict Euesque de Langres par le costé dextre, & ce luy de Beauuais par le senestre, reuerāment & apres auoir baisé leurs mains, soubleuerent ledict Seigneur de dessus son liet, & le menerent processionnalement dedans l'Eglise, marchant deuant luy monsieur le Connestable, son espee nue au poing, & vestu de tunique, mantel, & ayant cercle sur la teste, en la mesme forme & maniere que les pers contes laiz.

Apres ledict Seigneur marchoit tout seul monsieur le Chancellier vestu de son mantel & epitoge d'escarlatte rouge, fourré d'her mines, & son mortier de Châcellier. Et apres

luy marchoyent monsieur le Mareschal de
sainct Andre, faisant l'office de grand Mai-
stre,& vestu & habitué comme vng per, con-
te lay. A sa dextre, monsieur de Longueuille
grand Chambellan , vestu & habitué com-
me vng duc, per lay. A la senestre, monsieur
le Mareschal de la Marche , faisant l'office
de premier Chambellan , vestu & habitué
comme vng per, conte lay.

Et ainsi arriuez deuant le grand autel, a-
pres que le Roy eut faict son oraison, il fut
mené par lesdics Euesques de Langres &
Beauuais en sa chaize paree comme dict a
esté,& vis a vis de celle de mōdict sieur l'Ar-
cheuesque de Reims.

Derriere luy fut assis monsieur le Con-
nestable sans espee, par ce que a l'approcher
dudit grand autel , il estoit deffaict de la
sienne es mains d'ung sien escuyer pour
prendre celle qui seruit au mystere du sa-
cre, ainsi qu'il sera dict cy apres . Monsieur
le Chancellier derriere luy . Et plus en ar-
riere sur la selle & forme cy deuant desig-
nee, mesdics sieurs les Mareschal de sainct
Andre, duc de Longueuille, & Mareschal de
la Marche.

Et en attendant la venue de la saincte am-
polle, mondicte sieur de Reims, apres les o-

raisons contenues au ceremonial, donna de l'eaue beneiste audict Seigneur & a la circonstance. Et lors commenca le Cœur a dire tierce.

A la venue de ladicté sainte ampolle apportee par le grand prieur de saint Remi, estant monsieur le Cardinal de Lenoncourt abbé absent & en cour de Rome , ledict grand prieur monté sur la haquenee & soubz le poisle cy deuāt designe, porté par quatre religieux de ladicté abbaye, accompagné des autres religieux d'icelle , & desdicts quatre seigneurs , Mondict sieur de Reims marcha au deuant pontificalement, habitué & accōpaigné de ses Euesques, suffragans, & d'aucuns chanoines de ladicté eglise, avec sa croce & croix deuant luy iusques au grād portail de ladicté eglise: la ou il receut & print des mains dudit grand prieur representant son abbé, ladicté sainte ampolle, avec promesses & obligations de la rendre & restituer ledict sacre parfaict &acheué.

Et en telle maniere retourna audict grand autel, suyui dudit grand prieur, laissant ses dicts religieux hors le Cœur . Et ainsi que mondict sieur de Reims arriua audict grād autel tenant ladicté sainte ampolle, le Roy

se leua de sa chaize pour la reuerer deuement. Et durant le temps que mondict sieur de Reims reuint de receuoir ladicté saincte ampolle, iusques a son arriuee audict grand autel , se dirent & chanterent plusieurs antiennes & oraisons. Et lors ledict grād prieur de saint Remi 'se meit au costé dextre du dict grand autel,cōme gardien & tesmoing de ce qui se feroit de ladicté saincte ampolle. Et de l'autre costé dudit autel, se meit en pareil estat le grand commandeur de saint Denys, representat l'abbé dudit lieu, pour garder & administrer quand besoing seroit les habits royaux cy dessus declarez.

Et ce faict mondict sieur de Reims se retira au reuestiere qui luy auoit esté faict derriere le grand autel , pour se reuestir & habitter d'habits pontificaulx , comme pour dire messe, assiſté des Archeuesques , Euesques , & chanoines qui luy doyuent seruir a l'egleſe. Et lors qu'il reuint audict grand autel, le Roy se leua de sa chaize pour luy faire honneur: rassis en laquelle chaize, mondict sieur de Reims l'approcha , luy faisant les requestes ; & receuant de luy les sermēs amplement declarez es liures des anciennes ceremonies.

Et apres que ledict Seigneur eut faict le

serment de *Promitto*, il fut soubzleué de sa chaise par lesdicts Evesques de Lâgres & de Beauvais. Lesquels estoient ainsi debout, feirent contenance de demander au peuple & circonference fils l'acceptoyent pour Roy. Et comme ayans receu le consentement dudit peuple, mondict sieur de Reims luy feit faire le serment au royaume, qui se commence,
Hæc tria promitto: ayant la main sur le texte des Sainctes Euangiles qu'il baifa. Apres lequel serment, ledict Seigneur fut amené devant le grand autel, par lesdicts Evesques de Langres & Beauvais, & la fut deuestu par monsieur le Mareschal de la Marche, cōme premier Chambellan, de ladicte longue robbe de toile d'argent frizee qu'il auoit apportee du palais.

Et estant en sa susdict camisole de satin cramoisi, & ayant dict sur luy mondict sieur de Reims l'oraison accoustumee, monsieur le duc de Longueville comme grād Chambellan, luy chaussa les botines sendales, dōt cy devant est faicte mention. Et le Roy de Nauarre, comme duc de Bourgongne, luy meit les esperōs, & incontinent les luy osta. Mondict sieur de Reims apres la benedictio faicte sur l'espee royale estant dans le fourreau, la luy ceingnit, & incontinent apres la

Iuy desceingnit, la print nue en la main, laissant le fourreau sur l'autel : Et ainsi nue, disant l'oraison accoustumee, la meit es mains du Roy, lequel la receut en humilité, & la offrit & meit sur l'autel.

Et incontinent apres mondict sieur de Reims la print, & remit en la main du Roy, ledict Seigneur estant a genoulx : lequel la bailla incontinent a monsieur le Connestable (qui la porta tousiours nue deuant ledict Seigneur durant tous les actes qui furent faictz cy apres, & aussi durât le disner) mondicte sieur de Reims continuant les oraisons accoustumees sur ledict Seigneur. Apres les quellesacheuees & finies, il se retourna deuers le grand autel pour preparer la saincte & sacree onction en la forme qui sensuit.

Il print la platine du calice sainct Remi, sur laquelle il meit du sainct cresme autât qu'il en fault pour sacrer vng Euesque: & de ladict saincte ampolle , avec vne esguille d'or qui y pendoit , il print de la tressacree huile la grosseur d'ung pois, qu'il mesla du doigt avec ledict sainct cresme.

Pendant telz mysteres, les châtre & soubz-chantre dirent les antiènes de *Gentem Francorū*, & mondicte sieur de Reims les oraisons a ce destinees. Apres lesquelles le Roy se proster

na deuant l'appuy de son oratoire , & mon-
dict sieur de Reims quant & luy, pour vac-
quer a leurs deuotes contemplations . durat
lesquelles certains Euesques commenceret
la letanie, respondue par le Cœur . Et quand
ce vint a cest endroict de *Hunc famulum tuum*,
ledict Seigneur se leua, aussi mōdict sieur de
Reims, lequel tenat sa croce en la main gau-
che, & estant assis comme quand il veult sa-
crer vng Euesque , & disant plusieurs orai-
sons, apres lesquelles tenant ladicte platine
sur laquelle estoit ladicte tressacree onctio,
il cōmēca a oindre & sacrer ledict Seigneur.

Premierement au sommet de la teste.

Secondement & apres que lesdites cami-
sole & chemise luy furent ouuertes & aual-
lees en la poictrine.

Tiercement entre les deux espaules.

Quartement en l'espaul droicte.

Quintement en l'espaul senestre.

Sixtement au plis du bras dextre.

Septiemement au plis du bras senestre.

Et a chascune & singuliere desdites on-
ctions , mondict sieur de Reims disoit l'o-
raison de *vng te in Regem*. Et durant lesquelles
onctions , lesdicts chantre & soubzchantre
chantoyent l'antienne de *vnixerunt Salomonem*.
Et nōobstant icelles mōdict sieur de Reims

disoit autres particulieres oraisons, lesquelles paracheuees, il & sesdicts prelats assistas, releuerent & fermerent les fentes desdictes chemise & camisole. Et lors mōdict sieur de Longueuille bailla au Roy les trois habillemens qui se deuoyent mettre par deslus ladict camisole, & lesquels ledict Seigneur auoit fait faire de neuf, comme dict a esté cy deuant: c'est assauoir, celuy qui represente le soubzdiacre, celuy qui represente le dia-cre, & le mātel royal represētāt la chasuble.

Et le Roy estant ainsi vestu, mondict sieur de Reims reprint la platine sur laquelle estoit ladict tressacree onctiō, & en meit en la paulme de la main dextre dudit Seigneur pour la huietieme onction. Puis en celle de la main senestre pour la neuifieme & der-niere onction.

Et ledict Seigneur ayant ainsi les mains oinctes & sacrees, il les ioignit contre sa poitrine : & puis luy fut administré vne paire de gāts beneists par mōdict sieur de Reims, dedens lesquels ledict Seigneur meit les mains. Et ce fait mōdict sieur de Reims beneist vng anneau ouquel y auoit vng singu-lierement beau & riche diamant, duquel ledict Seigneur espousa le royaume, le rece-uant de la main de mondict sieur de Reims.

dedens le doigt medicinal de la main dextre:Puis print le sceptre royal estant sur l'autel , & le meit en la main dextre dudit Seigneur , la main de iustice en la senestre . Et est a entendre que a chascun & singulier des dictz mysteres y auoit particulieres oraisōs.

Et apres tout ce que dessus, mondict sieur le Chancellier se meit contre l'autel , tournant le visaige deuers le Roy & l'assistance. Et lors appella a haulte voix les douze pers selō leurs ordres & dignitez:toutefois pour l'acte du courōnement les laiz les premiers ainsi qu'il sensuit,

Syre Roy de Nauarre qui seruez pour le duc de Bourgōgne, presētez vous a cest acte.

Mōsieur le duc de Vendosme, qui seruez pour le duc de Normandie, presentez vous.

Mōsieur le duc de Guyse qui seruez pour le duc d'Aquitaine, presentez vous.

Mōsieur le duc de Neuers qui seruez pour le conte de Toulouse, presentez vous.

Monsieur de Mōtpencier, qui seruez pour le conte de Flandres, presentez vous.

Monsieur le duc d'Aumalle, qui seruez pour le conte de Chāpaigne, presentez vous a cest acte.

Et quant aux pers ecclesiastiques, ils furent appelez par mondict sieur le Chancel-

Iier selon l'ordre cy deuant designe'.

Icelle cōuocation faicte, mondict sieur de Reims se leua de sa chaize , & se tourna deuers le grād autel, sur lequel il print la grād' couronne de Charlemaigne , apportee de sainct Denys, cōme dict a esté, la meit sur le chef d uRoy, sans toutesfois le toucher. A la quelle tantost les pers seculiers & ecclesiasti ques mirēt les mains pour la soustenir, & pa reillemēt mondict sieur de Reims, disant l'oraison *Coronet te Deus*. Et puis luy seul asseit & posa sur le chef dudit Seigneur ladiete couronne: A laquelle tous les autres pers mirēt aussi la main , disant par mondict sieur de Reims l'oraison *Actipe coronā*, & plusieurs autres oraisons , lesquelles finies &acheuees, mondict sieur de Reims print le Roy par la māche du bras dextre, tenāt ledict Seigneur le sceptre & la main de iustice en ses mains: Iesdicts pers estans autour dudit Seigneur, & mettans autāt qu'ils pouoyēt la main a sa couronne, marchant deuāt luy monsieur le Connestable, l'espee nue en la main , apres luy monsieur le Chancellier. Et apres d'ung rang, mōsieur le Mareschal de sainct Andre au milieu, cōme grand Maistre . A sa dextre, mōsieur le duc de Longueville, comme grand Chambellan. Et a la senestre, mondict

sieur le Mareschal de la Marche, cōme pre-mier Chambellan.

Et en cest ordre & conuoy mondict sieur de Reims mena le Roy en son throsne & hault siege preparé au pulpitre, ainsi que dit a esté. Et la arriuez, le Roy estant tourné le dos contre la nef, mondict sieur de Reims le tenāt tousiours, luy dist, *In hoc regni solio, &c.* avec vne autre plus longue oraïson. Apres la quelle finie, & estant ledict Seigneur assis en son siege, il osta sa mittre. Et apres grāde reuerence & honneur par luy faict audict Seigneur, le baifa : & puis diſt a haulte voix, *Vivat Rex in æternum.* Apres luy le baiserēt tous les autres pers, disans semblablement, *Vivat Rex in æternum.* Et lors tout le peuple feit acclamation de, Viue le Roy, sonnans les trompettes, haultsbois, & tous instrumens: commencé par mondict sieur de Reims, *Te Deum laudamus*, accōpaigné d'orgues & autre musique.

Et durant ceste ioye & acclamation, tant dedens la nef de ladict eglise que dehors, en la place de deuant le grand portail se feit geet, dōnee, & largesse d'enuiron mil pieces d'or, dix mil pieces d'argent, forgees, & frappées de la representatiō & effigie dudit Seigneur, avec la date du iour & annee de son

tressainct sacre & courōnement, & de autre grande quātité d'escus & mōnoye cōmune.

Mōdict sieur de Reims apres auoir inthro nisé ledict Seigneur en son siege royal, & sa tiffaict a ce que dessus,descendit a bas pour officier & dire la grād messe, durāt laquelle se dist la petite messe ordinaire du Roy,a l'au tel préparé audict pulpitre,ainsi comme diēt est,le sceptre & main de iustice posez debout aux deux costez de l'appuy d'oratoire dudit Seigneur . Et quand ce vint a l'Euangile de la grād messe,ledict Seigneur se leua, & luy fut ostee la couronne de dessus la teste par le Roy de Nauarre,mise & assise sur le carreau dudit appuy . Le liure dudit Euangile fut apporté par l'Euesque de Soissons,lequel l'a uoit prononcee,marchant deuant monsieur le Cardinal de Lorraine, lequel print ledict liure dudit Euesque de Soissons lors qu'ils furent au hault dudit eschaffault : & apres les reuerences par luy faites au pied de la montee,au milieu d'icelle,tiercement quād il fut arriué pres dudit Seigneur,luy presen ta ledict liure a baiser , & puis le bailla au dict Euesque de Soissons , lequel le porta a mondict sieur de Reims officiant.Et mōdict sieur le Cardinal de Lorraine sen retourna en sa place au siege ou il estoit assis pres le

grand autel avec mesdicts sieurs les Cardinaulx.

Et quand ce vint a l'heure de l'offerte, mes sieurs de Vaudemont, d'E stampes, Marquis de Maine, & seigneur Orace de Fernaiz (les quels estoient assis durant le sacre & couronne-ment, derriere les pers laiz: & lors que le Roy monta en son throsne , se vindrent mettre en quatre chaizes des chanoines de ladict eglise , qui leur auoyent este aornees & parees de drap d'or raz, pour estre plus pres & a propos pour seruir a porter les offices de ladict offerte) partirent en l'ordre qui sensuit, C'est assauoir, le seigneur Orace portat le vin en vng grād vaisseau de nacles de perles , garni d'or , & enrichi de piergeries de tresgrād pris & valeur. Mōdict sieur le Marquis portant vng grād pain d'argent: Monsieur d'E stampes vng autre grand pain d'or: & mondict sieur de Vaudemont vne riche bourse de broderie, en laquelle y auoit treize grandes & espesses pieces d'or, emprain tes de l'effigie dudit Seigneur d'ung costé, & de l'autre de la saincte ampolle, avec la date du iour & annee dudit sacre: marchans deuant les dessusdicts, deux rois d'arimes: & ne omettans rien des reuerences en tel cas requises , monterent iusques au throsne du

Roy. Et incontinent eulx la arriuez, en repartirent en l'ordre qui sensuit . Et premièrement marchoyent lesdicts deux heraulx: apres eulx deux huissiers de la châbre du dict Seigneur : le seigneur Orace portant le vin, monsieur le Marquis de Maine portant l'ung des pains, monsieur d'Estampes portant l'autre, & monsieur de Vaudemont portant la bourse, ou estoient les treize pieces d'or. Puis messieurs les Chancellier & Mareschal de sainct Andre comme grand Maistre, monsieur le Cōnestable, l'espee nue en la main, le Roy tenāt en sa dextre le sceptre, & en la senestre la main de iustice, enuironné de tous les pers tant d'eglise que laiz. Et demourerēt audict throsne, comme pour le garder, mondict sieur de Longueuille grand Chambellan, & mondict sieur le Mareschal de la Marche, cōme premier Chambellan.

Lediēt Seigneur ainsi arriué au grand autel, lesdicts heraulx, huissiers, messieurs les Connestable, Chancellier, & Mareschal de sainct Andre, se tirerent des deux costez, faisans place a Loys monsieur de Vendosme, lequel vint reueramment prendre le sceptre pour en descharger le Roy : & monsieur le prince de la Roche sur Yon , la main de iustice. Et lors mōsieur de Vaudemōt apres re-

uerence deue, & auoir baisé la bourse en laquelle estoyst leſdictes treize pieces, la meit en la main du Roy pour l'offrir: monſieur d'Eſtampes, le pain d'or: monſieur le Marquis de Maine, celuy qui estoit d'argent: & le ſeigneur Orace, le riche vaisſeau ou estoit le vin . Et ladict eſfrande ainsy parfaict, & ayāt ledict Seigneur reprins leſdicts ſceptre & main de iuſtice, ſen retourna en ſon throsne & hault ſiege, accompagné de mesdicts ſieurs les pers , Conneſtable , Chancellier, & Mareschal de ſaint Andre . Et ceulx qui auoyent porté les offices de l'eſfrande, ſen retournerēt aux chaizes des chanoines ou ils estoient au parauant.

Se pourſuyuant la mesſe iusques au *Pax Domini*, mondict ſieur le Cardinal de Lorraine print la paix de mondict ſieur de Reims, le baſtant en la ioue , & remonta au ſiege & throsne du Roy, auquel il donna & preſenta la paix par ce meſme baifer. Et ce fait tous les pers qui estoient pres dudit Seigneur, tant eccliaſtiques que laiz, lui donnerent le baifer de paix.

La mesſe aſcheuee, mondict ſieur de Reims, ſappuya ſur l'autel attendant que meſſieurs les autres pers eccliaſtiques & ſeculiers auec la compagnie qui estoit en ce hault ſie-

C.i.

ge & throsne royal , eussent amené le Roy ,
lequel arriué pres du grand autel , se meit
soubz le pauillon dôt cy dessus est faict men-
tion, pour se reconseiller avec son cōfesseur,
& puis se vint mettre a genoulx deuant le
grand autel . Et apres auoir diēt son confi-
teor, & l'absolution a luy donnee par mon-
diēt sieur de Reims, receut le precieux corps
& sang de nostre Seigneur en grande humi-
lité & parfaicte deuotion. Et ce faict mōdiēt
sieur de Reims luy osta la grande couronne
qu'il auoit sur la teste, & luy meit la moyē-
ne plus legiere. Et icelle premiere couronne
fut bailee a mōsieur Danguyen pour la por-
ter deuāt ledict Seigneur iusques audict pa-
lais , marchant toutesfois tousiours mōdiēt
sieur le Connestable entredeux & plus pro-
chain dudit Seigneur.

Et ainsi reuestu de tous ses habillemens
royaulx, marcha iusques au palais. Et la ar-
riué, ladict grand' couronne apportee par
mōdiēt sieur Danguyé, fut mise sur le bout
de la table ia couverte, & la ou deuoit man-
ger ledict Seigneur , sur vng oreiller de ve-
loux cramoisi, enrichi de broderie, & pareil-
lement le sceptre & main de iustice.

Le Roy entra en sa chambre pour se des-
uestir, changer d'habillemens, se faire des-

gresser les mains du sainct cresme & huile,
& bailler la chemise de toile de Holande &
gants qui y auoyēt touché, a vng de ses aul-
mosniers prelat, pour estre bruslez. Et les
autreshabillemens commanda estre renduz
a celuy qui estoit venu pour l'abbé de sainct
Denys audict sacre.

Ledict Seigneur ainsi desuestu & reuestu
d'autres tresriches & somptueux habillemēs
& ayant sur sa teste vne courōne qu'il auoit
faict faire & estoffer des ioyaulx & bagues
de ses coffres: en laquelle y auoit quatre grā
des tables de diamās, dont les deux estoyēt
les plus grandes & spacieuses qui ayent ia-
mais esté veues : & d'autres diamās suyuans
les precedens tant au cercle du tour qu'a la
closture qui la faisoit imperiale par dessus.
Et entre le bōnet & la closture imperiale de
ladicte couronne, pendoit le rubi ballay, ap-
pelé loue de Naples , avec vne tresgrosse
perle qui rendoit vng merueilleux esclat de
lumiere.

Et ainsi se vint mettre a table sur vng hault
d'aix faict & preparé en la grāde salle du lo-
gis archiepiscopal, aornee & paree d'une tres
riche tapissérie d'or, d'argent, & soye, soubz
vng grād ders: le fons duquel estoit tout d'or
gaufré a gros grains d'orge, & par dessus en-

richi de personnages d'or nué , le fons d'or
traict, enrichi de passeures frizces d'argent
traict, les pentes de mesmes.

La table dudit Seigneur fut de neuf pieds
de long , vng pied plus hault que les tables
de messieurs les pers, qui estoient aux deux
bouts , ledict Seigneur ayant a sa dextre &
hault bout plus prochain de luy en l'une des
dictes tables vng pied plus basses que la sien
ne, monsieur l'Archevesque de Reims.

Monsieur le Cardinal de Giury, Evesque
& duc de Langres.

Monsieur le Cardinal de Chastillon, Evesque
& conte de Beauvais.

Monsieur l'Evesque de Noyon, conte per.

Monsieur l'Evesque de Xaintes, represen-
tant l'Evesque & duc de Laon, lequel en pre-
sence deuoit estre second apres monsieur
de Reims.

Monsieur l'Evesque de Troye, represen-
tant l'Evesque de Chaalons , lequel en pre-
sence eust precedé l'Evesque de Noyon.

A la senestre & a l'autre table vng pied
plus basse que celle dudit Seigneur estoët
assis, Le Roy de Nauarre plus prochain
dudit Seigneur, represenfant le duc de Bour-
gongne.

Monsieur le duc de Vendome, represen-

tant le duc de Normandie.

Monsieur le duc de Guyse , representant
le duc d'Aquitaine.

Monsieur le duc de Nevers, representant
le conte de Toulouse.

Monsieur le duc de Montpencier, repre-
sentant le conte de Flandres.

Monsieur le duc d'Aumalle, representant
le conte de Champaigne.

Monsieur le Mareschal de sainct Andre
seruit de grand Maistre , pource que mon-
sieur le Connestable ayant cest office, estoit
empesché a tenir l'espee nue deuant ledict
Seigneur durāt son disner, pource que ainsi
la ceremonie le requeroit.

Monsieur Danguyen seruit de pannetier.

Loys monsieur de Vendosme d'eschâson.

Et porterent la viāde les gentilshommes
de la chambre dudit Seigneur.

En ladictē salle y eut table particuliere
pour monsieur le Cardinal de sainct Geor-
ge legat de nostre sainct pere, & autres Car-
dinaulx. Et a ceste mesme table furent assis
messieurs les ambassadeurs. Tous les dessus
dicts d'ung costé.


Autres tables y eut en ladictē salle pour
les princes, cheualiers de l'ordre, capitaines,
& gentilshommes de la maison.

Apres le disner, le Roy se retira en sa chābre portant deuant luy monsieur le prince de la Roche sur Yō, la main de iustice: Loys monsieur de Vendosme, le sceptre: mōsieur Danguyen la grand' courōne qui auoit esté sur la table durant ledict disner . Et pource que le Roy auoit deliberé de passer toute ceste belle & saincte iournee en solennelle ceremonie, il souppa regalement en vne table sans difference de haulteur , en laquelle la Royne fut assise a sa senestre, apres elle madame Marguerite de Frāce sa seur. Et apres, de ce mesme rāg, avec certaines espaces entredeux , le Roy de Nauarre , auquel souper monsieur le Connestable seruit & feit son office de grand Maistre , monsieur de Vendosme seruit de pannetier, monsieur de Montpencier d'eschanson , & monsieur de Guyse d'escuyer trenchant.

Et fut la viāde portee par les gentilshommes de la chambre , comme elle auoit esté au seruice du disner.

Le lendemain ledict Seigneur fut ouir la messe & disner en l'abbaye de sainct Remi. L'autre iour d'apres seiourna en ladictē ville de Reims, entendant & pouruoyant a ses affaires. Et l'autre ensuyuant en partit pour aller a sainct Marcol, ainsi que ont eu de bō-

ne & ancienne coustume ses predecesseurs
Rois de Frâce. Or prions Dieu qu'il le nous
preste longuement, continuant en ses bon-
nes oeures & intentions, Par lesquelles il
a desia faict preue de sa vertu & du zele &
affection qu'il porte au bien de nostre fain-
cte religion, regime & gouuernement de ses
peuples & subiects.









SPECIAL ER-B
2084

